

Un Otro Sota Sosial

Sin duda AIDS ta un malesa horibel. No tin duda ku e enfermidat aki lo asotá nos islanan muchu mas den e añanan binidero. Ma tòg ta straño ku miéntras otro malesanan peligroso kontagiá dor di relashon seksual ta trastorná nos komunidad, AIDS SO ta haña publisidat. Kasi nunca nos ta tende tokante gonorea òf sífilis. Mayoria hende no tin ningun klase di idea kiko ta klamidia, herpes, viro papiloma humano, èts. Poko hende sa ku tin mas ku trinta diferente enfermedat venérikò i ku un pèrsona por kontagiá sinku di nan dor di *un solo enkuentro seksual*. Ma ningun komishon òf foyeto ta avisá nos di e enfermedatnan peligroso aki.

Pensa un ratu tokante sífilis. Penisilin ta 100% efektivu kontra e malesa aki. Tòg mas i mas hende na nos islanan ta kontagi'é, i algun ta ser infektá mas ku un biaha.

Dies te nobenta dia despues di relashon seksual ku un portadó, un peishi, blar, òf herida chikitu ta aparese unda e mikrobio a penetrá e kurpa. Hopi bes e pèrsona infektá no ta ripará esaki pasobra e no ta hasi doló. Sin tratamentu e ta desparesé di mes entre dos pa ocho siman. Ma e pèrsona infektá no a kura. E mikrobio ta skonde pa un tempu, i kualké partner seksual por ser infektá.

Por dura seis siman te seis luna promé ku e síntomanan di e di dos etapa ta sali na kla. E pèrsona infektá por sinti kansá, keintura, pèrdè kabei, erupshon kuráneo ("uitslag"), klir ta hincha, i haña frèt moli na órganu seksual òf ano. E síntomanan aki tambe por desparesé dentro di algun siman òf luna. Ma e etapa aki por ta e kousa di otro malesanan manera dehel, malesa di nir, miningitis, kambionan den wesu, i infekshonnan di wowo.

Por dura kuater aña promé ku e malesa ta atvansá pa e di tres etapa, e etapa ku 25% di tur hende infektá ku no ta haña tratamentu lo eksperensíá. Ora e enfermidat ta yega asina leu, gradualmente e por ataká e nèrvio sentral, sesu, kurason, wesunan, higra, stoma, kueru, adernan, i otro órganu. E por kousa fèrlaming, sieguidat, sordera, problema ku kordinashon di movimentu, pèrdè sintimentu di brasa i pia, dteriorashon di múskulo, lokura, òf asta morto.

Pa ser mas spesífiko, e mikrobio por ataká e ader mayó nèt riba kurason, ser'é parsialmente, i impedí e sanger di yega kurason. Esaki por hasi daño ireparabel na kurason òf pone e ader rementá i e pèrsona ta sangra te muri

Un muhé infektá na estado por kontagiá e beibi. Si e dama no ta haña tratamentu, e beibi tin solamente un chèns den seis ku e lo ta salú. Den 20% di e kasonan, e mama ta haña un mal parto ("miskraam") òf e beibi ta nase morto. Di beibinan ku ta nase bibu, 15% ta muri denter di dos luna, i 33% ta sufri daño permanente. E beibi por nase siegu, tin defékto ku djente, ta manká pa malesa di wesu, tin higra i bòfi muchu grandi. Of e beibi por parse salú ma despues keda siegu, surdu, paralisá, loko, òf muri yòn.

Maske antibiòtika por kura tur sífilis, e no por repará e daño ku e malesa aki ya kaba a hasi. P'esei, si bo tabatin relashon seksual ku un pusibel portadó, ta rekomendabel pa pidi dòkter pa hasi un tèst despues di diesdos siman (ora e resultado ta mas sigur). Si bo sa ku bo partner seksual ta infektá ku sífilis, buska antibiòtika mesora, pasobra bo tin 50% chèns di ser infektá.

Nos ta bisa muchanan ku ta hunga ku lusafè, "Si bo hunga ku kandela, kandela lo kimábo." Dios a komuniká e mésun bèrdat. "Un hende por tuma kandela den su skochi sin kima su paña? Of un hende por kana riba karbon kayente sin kima su pia? Asina ta esun ku drumi ku esposa di su próhimo; ken ku mishi kuné no ta keda sin haña kastigu" (Provèrbionan 6:27-29). Dios no ta gaña!

Bo sa ku Dios ta prohibí sèks fuera di matrimonio. Bo por ignorá Dios Su mandamentu, ma e konsekuensianan di bo desobediensia lo no ignorá bo! Bo no por gosa sèks ku esun ku bo ta haña bon sin sufri e konsekuensianan. Sífilis i otro enfermedatnan venérikò ta solamente UN konsekuensia di piká. Pa evitá TUR konsekuensia di inmoralidat, sigui Dios Su preskripshon: apstené di tur relashon seksual promé ku matrimonio, anto keda fiel na bo kasá.